

# WATENDAKAZI WAZAWA TANZANIA

*Re-arranged and translated by Pastor Stephen Letta*

## **Isaac Okeyo Midamba, (1886–1981)**

Isaac Okeyo Midamba alikuwa mwanzilishi wa mwalimu wa Waadventista na mhudumu miongoni mwa Wajaluo wa Kenya.

### **Maisha ya zamani**

Isaac Okeyo Midamba alizaliwa katika kijiji cha Kakwajuok, katika kaunti ndogo ya Rachuonyo Kaskazini, katika Kaunti ya Homa Bay magharibi mwa Kenya. Alikuwa mwana wa Midamba Onyango, na mama yake aliitwa Akech, binti Opana. Baba yake alikuwa mkulima mdogo ambaye pia alifuga wanyama. Isaac Okeyo alikuwa mzaliwa wa kwanza ambaye alifuatwa na dada wawili. Baba yake alikuwa na wake wengi na alikuwa na mke wa pili baada ya mama yake Okeyo. Akiwa mvulana mdogo na mwenye nguvu, alimsaidia baba yake kuchunga wanyama na pia kutunza shamba.

### **Kuwa Muadventista, Familia na Huduma**

Mchungaji A. Cascallen alipowasili Gendia mwaka wa 1906, Isaac Okeyo alikuwa miongoni mwa watu wa kwanza kujiunga na Misheni hiyo mpya, na hatimaye akawa Muadventista. Kisha akakuza hamu ya kusoma na kuandika kupitia Cascallen na msaidizi wake Peter Nyambo. Muda si muda akawa stadi, aliyeweza kusoma na kuandika vizuri kabisa. Alibatizwa mwaka wa 1911 wakati wa ubatizo wa kwanza kabisa uliofanyika Gendia. Mnamo 1912, Cascallen alimpa jukumu la kufundisha wavulana na wasichana wadogo katika Shule ya Misheni. Mnamo 1916, alimuoa Leah Menga, na walijaliwa watoto 14, ambao ni Samuel Midamba, Reuben Olwoch, William Ogweni, James Ougo, Rhoda Tindi, Elly Odhiambo, Tito Bonyo, David Opar, Polycarp Olonde, Moses Otieno, Doris Awuonda, Hulda Anyango, na Ruth Akech.

### **Ualimu, Uinjilisti, na Uchungaji**

Alifundisha kutoka 1912-1920. Mnamo 1920, aliacha kufundisha na kuwa mwinjilisti, kazi aliyoifanya kwa miaka miwili. Mnamo 1922, serikali ya kikoloni ilimwajiri kama karani wa ushuru, na mwaka wa 1926, aliacha utumishi wa serikali ili kuanza tena kazi yake ya kueneza injili. Mnamo 1932, alitawazwa kuwa mchungaji, Mwafrika wa pili kuwa mchungaji baada ya Paul Mboya. Mchungaji Okeyo alifurahishwa sana alipoona imani ya Waadventista ikistawi na kuenea sehemu mbalimbali za nchi hii. Alifanya kazi katika vituo mbalimbali hadi alipostaafu mwaka wa 1955.

Mchungaji Isaac Okeyo alikua mchungaji kama baba yake na akafa mwaka wa 2005. Mwanawe mwingine, Mwinjilisti Hezron Obunde, alikua mwinjilisti wa muda mrefu wa uinjilisti wa vitabu ambaye alifanya kazi na kufariki baada ya kustaafu mwaka wa 2017. Wajukuu kadhaa wa Isaac Okeyo leo wanahudumu katika makanisa mbalimbali katika nyadhifa tofauti. Mmoja wa wajukuu zake anahudumu kama mchungaji katika Konferensi ya Lake Kenya kama mkurugenzi wa idara.

## WATENDAKAZI WAZAWA TANZANIA

*Re-arranged and translated by Pastor Stephen Letta*

### **Urithi aliotuachia**

Isaac Okeyo Midamba alifariki mwaka 1981 akiwa na umri wa miaka 95 na kuzikwa nyumbani kwake Nyahera. Alikuwa ameanzisha kanisa pale lililoitwa Nyahera Kanisa la Gendia.

Mchungaji Isaac Okeyo aliacha urithi mzuri kama mhudumu wa Injili katika maeneo mengi katika eneo lililokuwa Kenya Lake Field. Alikuwa Mkenya wa pili kuwekwa wakfu kwa huduma ya Injili. Alipinga juhudi za watu wa Karachuonyo kumtawaza kuwa chifu wao baada ya kustaafu kwa chifu wao wa zamani, Okoth Ougo. Aliandika kitabu kiitwacho *Adventism in Africa*, ambacho kilichapishwa baada ya kifo chake mwaka wa 1989.

Watu wengi waliikubali imani ya Waadventista kwa sababu ya uthabiti na ushuhuda wake. Anakumbukwa kuwa mchungaji aliyekataa kazi ya kifahari ya kuwa chifu. Katika kijiji chake, kuna mchungaji aliyeitwa kwa jina lake - Mchungaji Isaac Okeyo Njoga, ambaye anafanya kazi katika field ya Lake Victoria iliyoko Homa Bay.